

Hari Bertemu Pelanggan SMK Mutiara Medan Interaksi Ibubapa dan Guru



Labuan, 27 Nov – Seramai kira-kira 200 ibubapa dan penjaga hadir dalam Hari Bertemu Pelanggan SMK MUTIARA yang telah diadakan pada 21 November lalu. Program yang bermula seawal jam 9.00am itu melibatkan pelaporan pencapaian murid-murid Tingkatan 1, 2 dan 4 sahaja.

Secara keseluruhan program ini berjaya mencapai objektif penganjurannya. Pengetua sekolah, Encik Mohd Nizam bin Yasim berkata tujuan Hari Bertemu Pelanggan ialah untuk memberi peluang kepada ibubapa dan penjaga murid-murid mengetahui lebih lanjut berkaitan perkembangan pembelajaran anak-anak mereka.

Pihak sekolah menyediakan empat jenis pelaporan kepada ibubapa selaras dengan pembelajaran berasaskan perkembangan seperti saranan di dalam Naratif Baharu Amalan Pendidikan dan Pentaksiran Berasaskan Sekolah (PBS).

Pencapaian dalam Ujian Standard Kecergasan Fizikal Kebangsaan (SEGAK) dan Penilaian Aktiviti Jasmani, Sukan dan Kokurikulum (PAJSK) adalah antara pentaksiran yang dilaporkan kepada ibubapa. Melalui pelaporan SEGAK, ibubapa dapat mengetahui tahap kecergasan fizikal dan Body Mass Index (BMI) anak masing-masing.

Melalui pelaporan kokurikulum yang dijana dari sistem PAJSK pula, ibubapa diberi maklumat berkaitan tahap pelibatan dan pencapaian anak masing-masing dalam aktiviti kokurikulum dan sukan secara kumulatif.



Interaksi guru dan ibubapa



Interaksi guru dan ibubapa

Selain itu, pelaporan Pentaksiran Bilik Darjah (PBD) juga dapat memberi maklumat kepada para ibubapa tentang prestasi pembelajaran anak-anak yang dinilai secara komprehensif sepanjang tahun. Pelaporan ini menjadi pelengkap kepada markah ujian akhir tahun yang dibuat sebagai 'assessment of learning' atau pentaksiran tentang pembelajaran.

Selain itu, ibubapa juga diberi maklum balas berkaitan sahsiah, disiplin dan status kehadiran anak-anak mereka. Perkara ini sangat penting kerana peranan, sokongan dan galakan ibubapa amat menyumbang kepada kemenjadian murid di sekolah.

Pengetua juga turut beramah mesra dengan ibubapa yang hadir. Selain berbincang hal-hal pendidikan anak-anak, pengetua turut memaklumkan halatuju sekolah tahun 2020 secara tidak langsung dan meminta kerjasama ibubapa bersama-sama untuk meningkatkan kualiti sekolah secara keseluruhan.

Salah seorang ibubapa yang ditemui, Encik Kalong Yusup berkata pihaknya mengucapkan terima kasih atas sumbangan guru-guru yang mengajar anaknya dan sentiasa memberi kerjasama kepada pihak sekolah jika diperlukan.

Majlis tamat kira-kira jam 12 tengahari.

Berita Oleh : SMK Mutiara



Encik Nizam



beramah mesra dengan ibu bapa

Anugerah Teknologi Pendidikan 2019



Labuan, 21 Nov – Jabatan Pendidikan Wilayah Persekutuan Labuan telah menganjurkan Anugerah Teknologi Pendidikan 2019 yang berlangsung di Bilik Benua, Sektor Sumber Teknologi Pendidikan (SSTP) pada 19hb November lalu.

Sebanyak 16 anugerah teknologi pendidikan dan ICT melibatkan kategori sekolah rendah dan menengah telah disampaikan pada majlis tersebut.

Majlis Anugerah Teknologi Pendidikan ini merupakan platform untuk mengiktiraf dan menghargai pencapaian murid , guru dan sekolah dalam penggunaan teknologi , pelaksanaan inisiatif ICT dan media pendidikan, pelaksanaan program literasi maklumat, Pusat Sumber Sekolah, pengurusan data dan program pembestarian sekolah.

Majlis kelolaan Sektor Sumber Teknologi Pendidikan (SSTP) dan Sektor Pengurusan Maklumat (SPMICT) ini telah dirasmikan oleh Pengarah Bahagian Sumber dan Teknologi Pendidikan (BSTP), KPM, Tuan Haji Shafruddin bin Haji Ali Hussin.

Dalam ucapannya, beliau mengimbau perkembangan teknologi di Malaysia terutamanya dalam mendorong transformasi dalam bilik darjah dan pengurusan pendidikan. Beliau turut menegaskan bahawa pendidikan berkualiti hari ini seharusnya mampu mengisi keperluan IR4.0.

Kementerian Pendidikan Malaysia akan meneruskan kerjasama dengan Malaysia Digital Economy Corporation (MDEC) untuk memperluaskan *Digital Maker Hub (DMH)*, secara perkongsian pintar dan *crowd funding*, sumbangan agensi dan syarikat serta dengan bantuan daripada institusi pendidikan tinggi.



Tuan Haji Shafruddin, Encik Raisin Saidin bersama warga dan para penerima anugerah dari SMK Labuan
Sementara itu, dalam ucapan aluan, Pengarah Pendidikan Wilayah Persekutuan Labuan, Encik Raisin Saidin berkata kemudahan ICT di Labuan agak baik berbanding dengan negeri lain terutama di sekolah-sekolah yang jauh di

pedalaman atau pulau kecil yang lain.

Justeru, warga pendidik seharusnya bersyukur dengan keadaan ini dan berusaha bersungguh-sungguh meletakkan Labuan di tempat yang wajar, khususnya dalam pembelajaran berasaskan ICT.

Tidak mustahil kita di Labuan, boleh menjalankan rintis “homeschooling” dan “eLearning” bagi murid-murid yang tidak dapat hadir ke sekolah atas sebab munasabah tetapi dapat belajar seperti biasa, tidak berlaku defisit pembelajaran dalam kalangan murid di pulau ceria ini. Encik Raisin Saidin

Turut hadir di majlis ini ialah Ketua Penolong Pengarah SSTP, Encik Ag Marten bin Haji Abdul Rahman, Pegawai Teknologi Maklumat, SPMICT, Encik Mohd Nazrien bin Abdul Rahman, para Pengetua dan Guru Besar, Guru Penyelaras Bestari/ICT, Guru Perpustakaan dan Media, Guru Data dan Maklumat.



Tuan Haji Shafruddin, Encik Raisin Saidin dan tetamu VVIP bersama pasukan tarian Antap Budaya SMK Pantai

Majlis Apresiasi Pusat Sumber DSDN SMK Ranche-Ranche 2019 rai pengawas tahun akhir



Labuan , 25 Nov 19 – Satu majlis jamuan akhir tahun rasmi bertemakan Majlis Apresiasi Pengawas Pusat Sumber sempena meraikan 12 pengawas Pusat Sumber tahun akhir di SMK Ranche-Ranche telah diadakan di Pusat Sumber DSDN pada 20 November lalu.

Majlis itu

bertujuan meraikan 12 pengawas tahun akhir di SMK Ranche-Ranche yang bakal

menamatkan pengajian mereka pada penghujung November

2019 dan memberi anugerah kepada pengawas ,

ibu bapa dan pelajar yang cemerlang dalam akademik dan penggerak aktif pusat sumber komuniti sepanjang tahun

2019.

Guru Perpustakaan dan Media , Encik Sapri bin Idris berkata selain meraikan pengawas pusat sumber tahun akhir, majlis itu dapat menyuntik semangat pengawas yang masih di peringkat awal persekolahan untuk sama-sama mengikuti kecemerlangan pengawas pusat sumber yang bakal menamatkan persekolahan mereka pada hujung November ini .

Pengetua SMK Ranche-Ranche, Encik Yahya Ahmad Puteh, ketika membuat ucapan alu-aluan berkata “Semua warga SMK Ranche-Ranche berbangga dengan pencapaian Pusat Sumber DSD SMK Ranche-Ranche atas komitmen kuat para pengawas pusat sumber membantu Cikgu Sapri bin Idris dalam aktiviti keceriaan PSS dan pelaksanaan program sepanjang tahun. Para pengawas berpeluang melibatkan diri pada majlis ini dengan melaksanakan tugas masing-masing dan secara langsung dapat mengeratkan hubungan silaturrahim serta meningkatkan kerjasama dalam kalangan para pengawas pusat sumber sekolah ” katanya.



Encik Yahya ketika membuat ucapan alu-aluan Majlis yang dianjurkan oleh pengawas pusat sumber Sesi 2019 dengan kerjasama pihak pengurusan Pusat Sumber Sekolah DSDN dan Bahagian Hal Ehwal Murid itu turut

dihadiri oleh Bapa Angkat SMK Rantau-Rantau iaitu Dato Sri Mohd Alias bin Haji Abdul Rahman, Penaung Pusat Sumber Dato Sri Hajah Norsiah binti Abdullah, Ketua Penolong Pengarah, Sektor Sumber Teknologi Pendidikan, Encik Awang Marten bin Dato Haji Abdul Rahman serta ahli komuniti pusat sumber sekolah.

Sebanyak lima anugerah utama iaitu Anugerah Penggerak Pusat

Sumber Komuniti, Anugerah Jasamu Dikenang, Anugerah Penghargaan Pengawas Pusat

Sumber , Anugerah Pengawas Pusat Sumber Terbaik, dan Anugerah Keseluruhan

Pengawas PSS Tingkatan Terbaik, telah disampaikan kepada pengawas pusat sumber

dan ahli pusat sumber komuniti yang cemerlang dalam bidang akademik dan kokurikulum , sahsiah serta pengurusan dalam PSS.

Anugerah Pengawas Pusat Sumber Cemerlang Akademik berjaya diraih oleh pelajar tahun akhir, Saudara Muazam bin Hazim. Anugerah itu merupakan anugerah utama Pusat Sumber DSDN SMK Rantau-Rantau yang diberikan kepada pelajar yang memenuhi kriteria cemerlang dalam PT3 dan peperiksaan percubaan SPM. Selain itu Saudara Pg. Azmilshah bin Azmishah telah menerima Anugerah Tangan Emas, Saudara Mohd Anas bin Hamzah telah menerima Anugerah Media Sosial dan Saudara Raziq bin Mat Kilau telah menerima Anugerah Ikon Rantau's FM .



Cikgu Sapri Idris GPM SMK Ranche-Ranche bersama pengawas yang diraikan

Pada tahun ini Saudara Nasrullah Hanudin telah menerima Anugerah Pengawas Pusat Sumber Terbaik yang mana kriterianya mempunyai kesetiaan tinggi kepada PSS, mempunyai dedikasi kepimpinan dan kredibiliti, banyak menyumbang tenaga dalam menjayakan setiap aktiviti PSS , tidak pernah dikenakan tindakan tatatertib. Anugerah Pengawas Pusat Sumber Terbaik Keseluruhan Tingkatan telah dimenangi oleh pengawas PSS Tingkatan 1. Majlis turut diserikan dengan persembahan nyanyian oleh saudari Anes Farisha.

Pusat Sumber DSDN SMK Ranche-Ranche merupakan antara pusat sumber yang terbaik di Malaysia. Pernah meraih tempat kelima 2016 dan keempat 2018 di peringkat Kebangsaan dalam pertandingan Anugerah Pusat Sumber Cemerlang anjuran Kementerian Pendidikan Malaysia. Ia juga menerima penarafan Pusat Sumber 5 Bintang oleh Kementerian Pendidikan Malaysia.

Berita Oleh : Encik Sapri Bin Idris, SMK Ranche-Ranche



Tetamu jemputan yang hadir Bapa Angkat SMK Ranche-Ranche iaitu Dato Sri Mohd Alias, Dato Sri Hajah Norsiah dan En. Awang Marten



En Azmishah Ag. Jamek Penerima Anugerah Penggerak PSS DSDN Komuniti 2019

Kem Kepimpinan Pengawas SMK Mutiara Membentuk Jatidiri Pemimpin Muda



Labuan, 23 Nov – Badan Pengawas SMK Mutiara telah menganjurkan Kem Kepimpinan Pengawas bagi tahun 2019 bertempat di Pusat Kokurikulum Kg Ganggarak W.P Labuan. Kem yang berlangsung pada 20 hingga 22 November lalu telah ditaja sepenuhnya oleh PIBG SMK Mutiara.

Seramai 30 orang calon pengawas terlibat dalam kem ini yang terdiri daripada 12 orang peserta lelaki dan 18 orang perempuan. Semua aktiviti telah dikendalikan oleh 16 orang fasilitator yang terdiri pengawas-pengawas senior.

Peserta kem telah dibahagikan kepada 4 kumpulan yang dibimbing oleh 2 orang fasilitator setiap kumpulan. Aktiviti-aktiviti sepanjang kem berlangsung telah dikendalikan sepenuhnya oleh Ketua Pengawas iaitu adik Muhd Amsyar Dzulqarnain Bin Amirullah (T.4) dan Timbalan Pengawas 1 adik Mohd Afiq Zulfadhli Bin Jafar (T.4).

Manakala Ustazah Rohani Binti Tali @ Md Ali bertindak sebagai kem komandan dibantu oleh Ketua Guru Pengawas Pn Maslinda Binti Mat Jan, Ketua guru disiplin En Yunus Bin Arsad dan Timbalan Kem Komanden Cg Zulrida Binti Ismail yang juga Jurulatih Kanan Puskowila.

Menurut Ustazah Rohani, kem ini bertujuan untuk meningkatkan jati diri dan keyakinan seorang pengawas terutama ketika menjalankan tugas. Beliau turut melahirkan rasa bangga kerana sepanjang kem ini berlangsung semua peserta telah melibatkan diri dalam semua aktiviti yang dirancang dengan penuh dedikasi dan berjaya melaksanakan semua tugas yang diamanahkan.

Kem selama 3 hari 2 malam yang dipenuhi dengan aktiviti-aktiviti membentuk jati diri dan kepimpinan. Antaranya ialah aktiviti latihan kecergasan, bengkel LDK, amali keagamaan, ikhtiar hidup dan khidmat masyarakat.



Pengawas SMK Mutiara juga bekesempatan bergotong-royong membersihkan kawasan rumah warga emas

Selain itu, peserta kem juga didedahkan dengan bengkel pengucapan awam yang dikendalikan oleh Tn Hj Minggu Bin Amat, Jurulatih Sukan di SMK Mutiara yang juga bekas guru kaunseling.

Peserta kem juga teruja apabila mereka dibawa ke kampung-kampung sekitar kawasan kem untuk melaksanakan khidmat sosial termasuklah bekerjasama dan bergotong-royong membersihkan kawasan rumah warga emas.

Sambil melaksanakan kerja amal, mereka turut sempat membuat temuramah dan beramah mesra dengan ketua kampung Ganggarak, Encik Rahmat bin Haji Ali dan Ketua Kampung Lubok Temiang, Encik Khalid bin Mohd Saniff. Selain itu, seorang penduduk Kg Lubok Temiang, En Aspan Bin Ngadi dan 2 orang warga emas iaitu Pn Hajjah Dayangku Isah Binti Pengeran Omar dan Pn Dayang Tengah Binti Daud turut juga di kunjungi dan disantuni.

Setiap kumpulan diwajibkan membuat laporan dan membentangkan hasil dapatan, pengalaman dan pengajaran setiap kali selepas berakhirnya sesuatu aktiviti. Kaedah ini untuk melatih para peserta membuat penilaian dan refleksi terhadap perkara-perkara yang dialami dan dipelajari.

Majlis penutupan telah dirasmikan oleh Pengetua SMK Mutiara En Mohd Nizam Bin Yasim. Dalam ucapannya, beliau berharap agar semua pengawas dapat melaksanakan tugas yang dipertanggungjawabkan dengan tegas dan amanah. Sebagai seorang pemimpin muda, mereka harus tabah dan berani dalam membantu guru menguatkuasa undang-undang dan peraturan-peraturan sekolah.

Beliau juga berpesan kepada semua peserta tentang peripentingnya mengamalkan rukun negara sepanjang masa dan bukannya dihafal semata-mata.



Ucapan perasmian penutup oleh Encik Mohd Nizam
Di akhir majlis, beliau turut menyampaikan hadiah-hadiah kepada peserta kem yang telah berjaya menunjukkan komitmen, semangat dan kerjasama yang tinggi. Adik Mohd Ifhan Alip Bin Noor Azmil (T.3) dan Adik Siti Aisyah Binti Abdullah (T.3) telah dipilih sebagai peserta terbaik kategori lelaki dan perempuan. Manakala Adik Muhd Mifzal Bin Mohd Rapi (T.3) dan Adik Mohd Izzat Bin Mohd Jais (T.2) telah dipilih sebagai fasilitator paling komited.

Sementara itu, adik Muhd Amsyar dan adik Mohd Afiq Zulafdhli turut dihargai atas usaha keras mereka mengendalikan kem ini dengan bersungguh-sungguh.

Pihak penganjur juga tidak melupakan jasa baik dan kerjasama Ketua-ketua dan penduduk kampung terlibat dengan menyumbang hamper berbentuk makanan dan minuman kepada wakil mereka iaitu Encik Aspan.

Berita Oleh : SMK Mutiara



Penyampaian hadiah kepada para peserta yang menunjukkan komitmen yang tinggi

**Murid-murid Program
Pendidikan Intregrasi
(PPKI) dan Program
Pendidikan Inklusif (PPI)
SMK Mutiara WP Labuan Dirai
Dalam Jamuan Akhir Tahun**



Labuan, 21 Nov – Seramai 58 murid PPKI dan PPI SMK Mutiara telah diraikan dalam majlis jamuan akhir tahun bertempat di salah sebuah restoran di pusat bandar pada Khamis. Jamuan yang bermula jam 2 petang telah dianjurkan oleh Guru-guru Pendidikan Khas dan Pembantu Pengurusan Murid (PPM) SMK Mutiara.

Puan Roslaniah binti Zainal, Penolong Kanan PPKI berkata majlis ini bertujuan untuk memberi kegembiraan kepada para murid-murid setelah melalui proses pembelajaran bagi tahun ini. Selain itu, majlis ini juga diadakan untuk menghargai komitmen murid, guru dan PPM sepanjang tahun 2019. Majlis ini turut dihadiri oleh En. Mohd. Nizam Bin Yasim, Pengetua SMK Mutiara WP Labuan.

Puan Roslaniah juga telah menyampaikan ucapan alu-aluan sebelum jamuan bermula. Beliau menyarankan agar semua murid PPKI menggunakan masa cuti sekolah ini sebaik mungkin dan bersedia untuk sesi persekolahan pada tahun hadapan. Beliau juga berharap agar murid-murid PPKI yang akan menamatkan persekolahan tahun ini terus berjaya dalam apa jua perkara yang diceburi.



Majlis jamuan dimulakan dengan bacaan doa oleh Adik Mohd. Jayrin B. Berjaya dan seterusnya menikmati jamuan yang telah disediakan. Sejurus kemudian, sesi cabutan bertuah pusingan pertama telah dibuat oleh Pn. Roslaniah Bt Zainal. Sesi cabutan bertuah kedua dan ketiga diteruskan lagi dan disampaikan oleh Pn. Masitoh, Pn. Nurul Hidayah dan Cik Nurazimah. Penyediaan hadiah cabutan bertuah disumbangkan oleh Guru dan PPM.

Pihak restoran juga telah memberi kerjasama yang baik dengan menyediakan juruacara dan juga acara-acara menarik sepanjang majlis berlangsung. Paling menarik perhatian ialah maskot chipmunk setinggi 6 kaki turut sama-sama meraikan murid-murid.

Kegembiraan jelas terpancar dari wajah murid-murid ini dengan peluang yang disediakan oleh guru-guru dan PPM PPKI SMK Mutiara. Mereka berasa teruja dan berharap agar aktiviti sebegini dapat diteruskan pada masa akan datang.

Majlis berakhir jam 4.00 petang dan semua murid diambil oleh ibubapa/penjaga masing-masing.

Berita Oleh : SMK Mutiara



**SMK Mutiara Terima Dua
Anugerah Teknologi
Pendidikan Peringkat W.P.
Labuan 2019**



Labuan, 20 Nov – Seramai 5 murid SMK Mutiara menerima penghargaan dalam Majlis Anugerah Teknologi Pendidikan peringkat Wilayah Persekutuan Labuan bagi tahun 2019 yang diadakan di bangunan Sektor Sumber dan Teknologi Pendidikan (SSTP) yang berlangsung pada 19 November 2019.

Mereka yang menerima penghargaan hari ini ialah Adik Darryiell Karllen, Adik Melvane Chew, Adik Amberly Shannon Koh, adik Connie Yap dan adik Nur Hamisha binti Hamdan yang telah berjaya menjadi Johan dalam pertandingan National ICT Security Discourse (NICTSeD) CyberSAFE Challenge Trophy peringkat Wilayah Persekutuan Labuan yang telah diadakan pada Julai lalu.

NICTSeD merupakan salah satu program keselamatan cyber di sekolah yang bertujuan untuk mendidik serta mempertingkatkan kesedaran orang ramai mengenai isu-isu teknologi dan sosial yang dihadapi oleh para pengguna internet terutamanya mengenai bahaya semasa berada atas talian (online).

Mereka telah menerima sebuah tropi dan sijil penghargaan individu atas kejayaan ini. Adik Darryl yang ditemui

telah melahirkan rasa gembira atas penghargaan ini dan menjadi pencetus semangat untuk melaksanakan yang lebih baik dalam pertandingan tahun depan.



Gambar Kenangan : Tuan Haji Shafruddin, Encik Raisin Saidin, Encik Mohd Nizam bersama Guru Penyelaras Bestari dan Pelajar SMK Mutiara

Pengetua SMK Mutiara, Encik Mohd Nizam bin Yasim turut mengucapkan tahniah kepada murid-murid yang menerima penghargaan hari ini dan telah mengharumkan nama sekolah.

“Peranan guru ialah sebagai pembimbing murid-murid dalam apapun aktiviti yang diceburi. Mereka membuka ruang, memberi peluang kepada murid dalam proses membentuk kemenjadian murid secara holistik. Guru-guru perlu bersungguh-sungguh dalam usaha mengangkat martabat dan harga diri murid melalui pelibatan dalam aktiviti luar bilik darjah” Encik Mohd Nizam Yasim.

Mereka juga telah mewakili W.P. Labuan ke peringkat kebangsaan pada Jun lalu di Pahang namun hanya mampu meraih saguhati sahaja.

Majlis Anugerah Teknologi Pendidikan anjuran Sektor

Sumber dan Teknologi Pendidikan Negeri kali ini telah dirasmikan oleh Pengarah Bahagian Sumber dan Teknologi Pendidikan (BSTP), KPM, Tuan Haji Shafruddin bin Haji Ali Hussin.

Turut hadir di majlis ini ialah Pengarah Pendidikan Wilayah Persekutuan Labuan, Encik Raisin Saidin, Ketua Penolong Pengarah SSTP, Encik Ag Marten bin Haji Abdul Rahman, Pegawai Teknologi Maklumat, SPMICT, Encik Mohd Nazrien bin Abdul Rahman.

Berita Oleh : SMK Mutiara

Fakulti Sains Dan Sumber Alam UMS Kongsi Ilmu Dengan Murid SK Pekan Satu



Labuan, 19 November

2019- Sekolah Kebangsaan Pekan

Satu (SKPS) Wilayah Persekutuan Labuan sekali lagi telah menerima rombongan

lawatan dari pelajar Universiti Malaysia Sabah (UMS) Kota Kinabalu, Selasa

lalu. Rombongan seramai 24 orang yang diketuai oleh Pensyarah Kanan Fakulti Sains dan Sumber Alam, Dr Chee Fuei Pien itu berada di SKPS bermula jam 9 pagi sehingga 11.30 pagi.

Menurut Dr Chee Fuei Pien, lawatan ini merupakan lawatan bersifat muhibah untuk memupuk semangat kerjasama berpasukan dalam kalangan pelajar UMS dan guru-guru SKPS di samping dapat meningkatkan lagi ilmu khususnya mengenai ilmu pendidikan dalam kalangan mahasiswa.

Ketibaan rombongan lawatan ini disambut meriah oleh Guru Besar SKPS, Anita Syhamini A/P S. Azman bersama Pegawai Perhubungan Sekolah ASP Amy Dasni Danial. Turut menyambut mahasiswa UMS itu ialah Penolong-penolong Kanan SKPS, Zailiana Zainol (PK Pentadbiran), Normah Rahimi (PK HEM), Esmi Amat (PK Kokurikulum) dan 23 guru tahun 6 sebagai tanda sambutan kasih muhibah yang tidak terhingga kepada rombongan pelawat.

Dalam berkongsi kaedah serta teknik pengajaran dan pembelajaran yang lebih efektif dan sinonim dengan dunia pendidikan yang bersifat global, rombongan Fakulti Sains dan Sumber Alam (FSSA) juga disajikan dengan beberapa aktiviti seperti melawat kawasan sekolah SKPS dan galeri seni yang dinamakan sebagai The Re-Born Of SKPS Art Gallery.

Mereka turut menyaksikan pameran seni seperti hasil cantingan batik MBK (Murid Berkeperluan Khas) dan kertas lukisan serta

hasil kreativiti MBK SK Pekan Satu yang dilaksanakan bersama guru serta corak yang menarik pada baju dan kasut dan pelbagai lagi yang ada di galeri seni SKPS.

Di samping itu, mahasiswa bukan sahaja berkesempatan beramah mesra dengan murid-murid SK Pekan Satu malah sempat menyajikan motivasi kepada 150 murid-murid tahun 6 yang diadakan di Dewan C.U.N SK Pekan Satu. Jelajah muhibah ini dapat membantu percambahan dan kolaborasi ilmu pengetahuan dalam kalangan guru-guru serta mahasiswa khususnya yang berteraskan kepada pengajaran dan pembelajaran.



Wakil murid bersemangat bersoal jawab dengan pelajar UMS semasa sesi motivasi dijalankan Anita Shyamini A/P S. Azman berharap agar lawatan muhibah seperti ini dapat memupuk ikatan silaturrahim akan terus terjalin dan berkesinambungan sebagai salah satu wadah kemenjadian murid pada

masa hadapan sesuai dengan kelestarian akademik yang lebih berkualiti. Beliau juga berharap agar guru-guru di sekolah ini dapat menelusuri dan mengaplikasikan kaedah baru dalam usaha mendidik murid-murid serta mampu mengharmonikan sikap positif agar sehati dalam kehidupan seharian dalam arus dunia pendidikan yang semakin mencabar.

Akhir sekali, penyelar program Nor Atirah Ahmad mengucapkan ribuan terima kasih kepada pihak SKPS kerana sudi menerima jelajah muhibah ini. "Kami amat teruja kerana diberi peluang untuk membantu guru-guru menyusun atur bilik Pusat Sumber Sekolah (PSS) yang kini dalam proses dinaiktaraf," tambah beliau lagi.



Alumni SKPS Muhammad Aqif Bashah Mohd Zalfa (dua kanan) menyampaikan cenderahati kepada wakil murid bagi menghias bilik PSS sambil diperhatikan oleh Nor Atirah Ahmad (kanan) dan Dr Chee Fuei Pien (dua kiri).



Puan Anita Shyamini A/P S. Azman (tiga kiri) menyampaikan cenderahati kepada Dr. Chee Fuei Pien sambil diperhatikan oleh Zailiana (kiri), ASP Amy Dasni dan Nor Atirah Ahmad (kanan).

Meningkatkan Kemahiran Bahasa Inggeris Melalui 'Pyjamas Party'



Labuan, 21 Nov– SATU program bagi memperkasakan kemahiran Bahasa Inggeris di kalangan murid-murid Tahun 3 di sekolah rendah di Labuan telah dilaksanakan di Isro Group Homestay. Program ini telah dianjurkan oleh Unit Bahasa Inggeris, Sektor Pembelajaran, Jabatan Pendidikan W.P.Labuan yang melibatkan 35 orang murid dan 17 orang guru dari 17 buah sekolah rendah di Labuan.

Program yang bertemakan 'Pyjamas Party' ini, bertujuan untuk membantu murid – murid di Tahun 3 yang berada di Tahap A1 (High) untuk mencapai sekurang-kurangnya Tahap A2 (Low) bagi 4 kemahiran iaitu 'listening', 'speaking', 'reading' dan 'writing' berdasarkan skala CEFR. CEFR merupakan ringkasan bagi 'The Common European Framework of Reference for Languages'. CEFR ini ialah skala Eropah yang direka khas untuk

menggambarkan tahap kecekapan dan penguasaan mendengar, bertutur, membaca dan menulis murid-murid di dalam Bahasa Inggeris.

'CEFR Pajamas Party' ini telah dilaksanakan secara aktiviti berkumpulan. Murid-murid memakai baju tidur dan diberikan sebiju bantal. Bantal-bantal ini mempunyai cetakan 'grammar' yang membantu murid-murid berkomunikasi dan menulis ayat mudah yang sesuai dengan aras A2 (Low) dengan betul. Antara 'grammar' yang dilampirkan di atas bantal berkenaan ialah 'singular & plural present & past tense for 'verb to be', 'to have' & 'to do'.



Murid-murid melaksanakan aktiviti dengan bimbingan guru.



Murid-murid berkomunikasi sesama rakan dengan menggunakan Bahasa Inggeris.

**Empat murid SMK Mutiara
sertai Orienteering Kadet
Pasukan Badan Beruniform
Kebangsaan 2019.**



Labuan, 19 Nov – Seramai 4 murid SMK Mutiara telah terpilih menyertai program Orienteering Kadet Pasukan Badan Beruniform peringkat kebangsaan yang telah berlangsung di Labuan dari 15 hingga 18 November 2019.

Mereka yang terpilih ialah adik Muhd Amsyar Dzulqarnain Bin Amirullah (T.4) dan Mohd Afiq Zulfadhli Bin Jafar (T.4) dari pasukan Kadet Bomba dan Penyelamat, adik Nor Faiqah (T.4) dari Kadet Remaja Sekolah (KRS), adik Mohammed Affizie Bin Sawang @ Rizal (T.3) dari Kadet Jabatan Pengangkutan Jalan (Kadet JPJ).

Program anjuran Bahagian Kokurikulum dan Kesenian (BKK), KPM ini telah dikelolakan sepenuhnya oleh Jabatan Pendidikan W. P. Labuan melibatkan semua negeri seluruh Malaysia, walau bagaimanapun Terengganu dan Pulau Pinang tidak dpt menghantar peserta ke program ini.

Lokasi utama pelaksanaan program meliputi seluruh Pulau Labuan dan Pulau Papan. Para peserta telah mengikuti pelbagai aktiviti menarik sepanjang program ini.

Antara aktiviti menarik ialah pertandingan menumpah

ambuyat dan membungkus kelupis yang dilaksanakan dengan kerjasama penduduk kampung Sungai Bedaun. Selain itu para peserta turut berpeluang menerokai keindahan pulau Labuan berjalan kaki melalui Chimney Trail yang penuh warisan sejarah dan berkayak merentasi selat ke Pulau Papan.



Adik Amsyar mewakili pasukan Labuan menerima anugerah johan pertandingan ikatan dan simpulan tali.

Ketua Penolong Pengarah Kanan, yang hadir sebagai wakil rasmi Pengarah BKK, Tuan Haji Mohd Rashid Mean menyifatkan program orienteering ini telah berjaya memberi pengalaman di luar bilik darjah sebagai pelengkap kepada kandungan pembelajaran di dalam bilik darjah.

Acara perasmian penutupan berlangsung di Pusat Kokurikulum telah disempurnakan oleh Pengarah Pendidikan W.P. Labuan, Encik Raisin bin Saidin.

Pasukan Kadet Beruniform W.P. Labuan telah dinobatkan sebagai juara keseluruhan dengan menjuarai 3 kategori aktiviti berbentuk pertandingan antara negeri. Pasukan W.P. Labuan telah berjaya menjadi johan dalam pertandingan ikatan seraya dan serong, simpulan tali temali dan video pendek 1 minit.

Pasukan Selangor pula mendapat tempat kedua keseluruhan manakala Pasukan Johor di tempat ketiga.

Pengetua SMK Mutiara, Encik Mohd Nizam bin Yasim yang berkesempatan hadir di dalam majlis penutupan mengucapkan tahniah kepada semua murid yang berjaya mengharungi cabaran orienteering ini dengan jayanya.

Beliau juga mengucapkan terima kasih kepada semua guru SMK Mutiara yang terlibat sebagai ajk pelaksana dan guru pengiring sepanjang program ini berlangsung.

Berita Oleh : SMK Mutiara



Salah satu aktiviti Orienteering Kadet Pasukan Badan Beruniform Kebangsaan 2019

PASUKAN KADET BERUNIFORM LABUAN JUARA KESELURUHAN : Orienteering Kadet Pasukan Badan Beruniform Peringkat Kebangsaan 2019



Labuan, 19 Nov – Pasukan Kadet Beruniform Wilayah Persekutuan Labuan dinobatkan sebagai Juara Keseluruhan Orienteering Kadet Pasukan Badan Beruniform Peringkat Kebangsaan 2019 yang telah berlangsung pada 16hb November sehingga 18hb November melibatkan destinasi program di tempat-tempat menarik di Labuan.

Lokasi utama pelaksanaan program meliputi seluruh Pulau Labuan dan Pulau Papan melibatkan 100 orang peserta dari negeri-negeri seluruh Malaysia, walau bagaimanapun Terengganu dan Pulau Pinang tidak dapat menghantar peserta ke program ini.

Program seumpama '**Amazing Race**' ini berjaya menarik peserta mengunjungi tempat-tempat menarik di Labuan, antaranya Memorial War, Muzium Labuan, Muzium Chimney, Kompleks Sukan Air, Kampung Sungai Bedaun, Surrender Point, Taman Damai Layang-Layang, Pantai Pancur Hitam, Taman Burung, Taman Botanikal dan Pulau Papan.

Dalam memberi peluang mendekati budaya dan sejarah setempat, para peserta berpeluang menumpang ambuyat, membungkus kelupis dengan masyarakat kampung Sungai Bedaun dan menerokai keindahan pulau Labuan, berjalan kaki melalui Chimney Trail yang penuh dengan warisan sejarah serta berkayak ke Pulau Papan.



Aktiviti menerokai keindahan pulau di sepanjang pantai



Para peserta seronok dan ceria sepanjang aktiviti berlangsung



Aktiviti swafoto setelah selesai melaksanakan tugas yang diberikan

Para peserta telah diintegrasikan dari pelbagai negeri agar dapat bergaul mesra, berkenal-kenalan seterusnya menimbulkan rasa hormat-menghormati, tanggungjawab, kasih sayang dan kegembiraan dalam kalangan mereka.

Program anjuran Bahagian Kokurikulum dan Kesenian (BKK), Kementerian Pendidikan Wilayah Persekutuan ini telah dikelolakan sepenuhnya oleh Jabatan Pendidikan Wilayah Persekutuan Labuan.

Ketua Penolong Pengarah Kanan, yang hadir sebagai wakil rasmi Pengarah BKK, Tuan Haji Mohd Rashid Mean menyifatkan program orienteering ini telah berjaya memberi pengalaman di luar bilik darjah sebagai pelengkap kepada kandungan pembelajaran di dalam bilik darjah.

Acara perasmian penutupan telah disempurnakan oleh Pengarah Pendidikan Wilayah Persekutuan Labuan, Encik Raisin bin Saidin.

Dalam ucapannya beliau telah memuji peranan guru yang bersungguh-sungguh mengangkat martabat dan harga diri murid melalui program-program di luar bilik darjah yang memberi pengalaman berinteraksi dengan alam.

Beliau turut menyeru semua peserta dari luar Labuan mengambil peluang meneroka keindahan Labuan sebagai sebuah pulau bebas cukai yang kaya dengan sejarah.

“Setiap anak murid perlu ditetapkan KPI tertentu dalam pelibatan dalam aktiviti kokurikulum untuk memberi ruang pengembangan potensi optimum melangkaui aspek akademik semata-mata” Encik Raisin Saidin

Menurutnya lagi, para peserta seharusnya dapat merasai kesan yang mendalam selepas melalui program ini dan diterjemahkan di dalam bentuk perubahan tingkah laku positif di dalam diri masing-masing.



Encik Raisin Saidin merakamkan gambar kenangan bersama kontinjen Selangor Darul Ehsan



Encik Raisin Saidin menyampaikan sijil dan hadiah kepada salah seorang pemenang

Program ini telah mendapat bantuan dan komitmen yang tinggi dari 21 agensi di Wilayah Persekutuan Labuan dengan kepakaran masing-masing.

Pasukan Kadet Beruniform W.P. Labuan telah dinobatkan sebagai juara keseluruhan dengan menjuarai 3 kategori aktiviti berbentuk pertandingan antara negeri.

Pasukan W.P. Labuan telah berjaya menjadi johan dalam pertandingan ikatan seraya dan serong, simpulan tali temali dan video pendek 1 minit. Pasukan Selangor pula mendapat tempat kedua keseluruhan manakala Pasukan Johor di tempat ketiga.

Pengurus Program, Encik Mohd Aminuddin Abdul Malek turut merakamkan setinggi-tinggi penghargaan, terima kasih atas kerja berpasukan dan kerjasama yang telah diberikan oleh semua pihak dalam menjayakan program yang julung-julung kali dianjurkan ini.

Turut hadir dalam majlis penutupan ialah DSP Mohd Firdaus bin Ramli daripada IPK Polis Labuan, Encik Muhammad Nazly Ho bin Abdullah, Pengarah Jabatan Muzium Labuan dan Encik Asbola Amit, Timbalan Pengarah Pembangunan Murid, Jabatan Pendidikan W.P.Labuan.

Berita Bersama : Encik Mohd Nizam bin Yasim



Encik Mohd Aminuddin (dua dari kanan) menyambut ketibaan pasukan dari negeri Kedah